



**Rješenje**  
**o ocjeni koncentracije privrednih subjekata**  
**Tesla d.d. Brčko i iQ Power AG**



Broj: 05-26-1-019-7-II/11  
Sarajevo, 29.11.2011. godine

Na osnovu člana 25. stav (1) tačka e) i člana 42. stav (1) tačka d), u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05, 76/07 i 80/09), rješavajući po zajedničkoj Prijavi koncentracije privrednih subjekta „Tesla” d.d. Brčko, Braće Ćuskića br. 13 Brčko distrikt, Bosna i Hercegovina i iQ Power AG, Metallstrasse 9, 6304 Zug, Švicarska koje zastupa advokat Nihad Sijerčić, Trg Djece Sarajeva 1/V, Sarajevo, Bosna i Hercegovina, zaprimljenoj dana 20.9.2011. godine pod brojem: 05-26-1-019-II/11, Konkurencijsko vijeće, na 22. (dvadesetdrugoj) sjednici održanoj dana 29.11.2011. godine, donijelo je

### **R J E Š E N J E**

1. Ocjenjuje se dopuštenom koncentracija koja će nastati osnivanjem novog privrednog subjekta u Bosni i Hercegovini na tržištu proizvodnje i prodaje novih i recikliranih akumulatora, od strane privrednih subjekta Tesla d.d. Brčko i iQ Power AG, putem zajedničkog ulaganja na dugoročnoj osnovi.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 20.9.2011. godine pod brojem: 05-26-1-019-II/11 zaprimilo zajedničku Prijavu koncentracije (u daljem tekstu: Prijava) privrednih subjekta „Tesla” d.d. Brčko, Braće Ćuskića br. 13 Brčko distrikt, Bosna i Hercegovina i iQ Power AG, Metallstrasse 9, 6304 Zug, Švicarska (u daljem tekstu : Podnosioci prijave ili Tesla i/ili iQ Power) podnesenu putem advokata Nihada Sijerčića, Trg Djece Sarajeva 1/V, Sarajevo, Bosna i Hercegovina, kojom isti namjeravaju osnovati novi privredni subjekt putem zajedničkog ulaganja na dugoročnoj osnovi i koji će biti pod njihovom zajedničkom kontrolom.

Konkurencijsko vijeće je utvrdilo da Prijava nije kompletna i uredna po članu 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 34/10), te je zatražilo dopunu iste, dana 26.9.2011. godine aktom broj 05-26-1-019-1-II/11, nakon čega su Podnosioci prijavu dopunili dana 4.10.2011. godine podneskom broj 05-26-1-019-2-II/11.

Konkurencijsko vijeće je Podnosiocima prijave izdalo Potvrdu o prijemu kompletne i uredne Prijave, dana 9.11.2011. godine akt broj 05-26-1-019-3-II/11, u skladu sa članom 30. stav (3) Zakona.

Podnosioci prijave su u smislu člana 30. stav (2) Zakona naveli da nemaju obavezu podnijeti zahtjev za ocjenu koncentracije tijelima ovlaštenim za ocjenu koncentracije izvan Bosne i Hercegovine.

Podnosioci prijave su Prijavu podnijeli u roku propisanom članom 16. stav (1) Zakona. Konkurencijsko vijeće je dana 9.11.2011. godine, u skladu sa članom 16. stav (4) Zakona, izdalo Obavještenje o dostavljenoj Prijavi (akt broj: 05-26-1-019-5-II/11 od 9.11.2011. godine) u dnevnoj štampi Bosne i Hercegovine i web stranici Konkurencijskog vijeća [www.bihkonk.gov.ba](http://www.bihkonk.gov.ba), u kojoj je objavilo podatke o namjeravanoj koncentraciji, te pozvalo sve direktno zainteresovane strane na dostavljanje pisanih komentara u pogledu provedbe iste. Na predmetno Obavještenje nisu dostavljeni komentari zainteresovanih strana.

Konkurencijsko vijeće je, u postupku ocjene predmetne koncentracije, utvrdilo slijedeće činjenice:

## **1. Učesnici koncentracije**

Učesnici koncentracije su privredni subjekti Tesla d.d. Brčko, Braće Ćuskića br. 13 Brčko distrikt, Bosna i Hercegovina i iQ Power AG, Metallstrasse 9, 6304 Zug, Švicarska.

### **1.1. Privredni subjekt Tesla**

Privredni subjekt Tesla je dioničko društvo registrovano u skladu sa zakonima Brčko distrikta Bosne i Hercegovine u Osnovnom sudu Brčko distrikta pod matičnim brojem upisa 1-1657, sa sjedištem u Braće Ćuskića br. 13 Brčko distrikt, Bosna i Hercegovina.

Privredni subjekt Tesla izlistan je na Banjalučkoj berzi, a većinski vlasnik dioničkog kapitala je fizičko lice Miodrag Bukvić, [(..)] (lična karta ...)]\*<sup>1</sup>.

Pretežna djelatnost privrednog subjekta Tesla je proizvodnja akumulatora i reciklaža iskorištenih, otpadnih akumulatora. Privredni subjekt Tesla posjeduje proizvodne kapacitete od 350.000 akumulatora godišnje i kapacitete reciklaže od 30.000 mt iskorištenih, otpadnih akumulatora, te sve svoje proizvode prodaje na području čitave Bosne i Hercegovine.

#### **1.1.1. Povezana društva privrednog subjekta Tesla na tržištu Bosne i Hercegovine**

Privredni subjekt Tesla je prisutan na tržištu Bosne i Hercegovine i putem povezanih privrednih subjekta FIB TESLA d.o.o. Brčko distrikt, KLAS d.o.o. Brčko distrikt i PEKARA KLAS Brčko distrikt.

Privredni subjekt FIB TESLA d.o.o. Brčko distrikt, Braće Ćuskića 13, Brčko, je društvo sa ograničenom odgovornošću za proizvodnju, trgovinu i usluge, upisano u registar Osnovnog suda Brčko distrikta Bosne i Hercegovine pod matičnim brojem upisa: 96-01-0068-11, sa sjedištem u Braće Ćuskića br. 13 Brčko distrikt. Privredni subjekt je registrovan u 2011. godini i prema podacima iz prijave još nije aktivan.

Privredni subjekt KLAS d.o.o. Brčko distrikt, Sandići br.124, Sandići, Brčko distrikt, upisan je u registar Osnovnog suda Brčko distrikta Bosne i Hercegovine pod matičnim brojem upisa: 1-346,

---

<sup>1</sup>[(..)]\*- Podaci predstavljaju poslovnu tajnu, u smislu člana 38. Zakona o konkurenciji

sa sjedištem u Sandići br.124, Sandići, Brčko distrikt. Pretežna registrovana djelatnost privrednog subjekta KLAS d.o.o. je mlinsko-pekarska djelatnost.

Privredni subjekt PEKARA KLAS Brčko distrikt, Edhema Mulabdića br.2, Brčko, upisan u registar Osnovnog suda Brčko distrikta Bosne i Hercegovine pod matičnim brojem upisa: 3-457, sa sjedištem u Edhema Mulabdića br. 2, Brčko distrikt. Pretežna registrovana djelatnost privrednog subjekta PEKARA KLAS je zanatsko-pekarska djelatnost.

Sva povezana društva privrednog subjekta Tesla nalaze se u 100% vlasništvu fizičkog lica Miodraga Bukvića, [(..) (lična karta ...)]\*.

## **1.2. Privredni subjekt iQ Power**

Privredni subjekt iQ Power je dioničko društvo registrovano u Trgovačkom registru kantona Zug u Švicarskoj pod brojem registra CH-170.3.027.783-9 , sa sjedištem u Metallstrasse 9 6304 Zug, Švicarska.

Pretežne registrovane djelatnosti privrednog subjekta iQ Power su trgovina proizvodima, komponentama i sistemima za snabdijevanje energijom, skladištenje energije, proizvodnja energije i energetske menadžment, direktno ili indirektno sticanje, prodaja i upravljanje udjelima u preduzećima u zemlji i inostranstvu, te obavljanje finansijskih poslova.

Prema podacima iz prijave privredni subjekt iQ Power nema povezanih društava u Bosni i Hercegovini i ima minimalan prihod na tržištu Bosne i Hercegovine, dok glavninu svojih proizvoda prodaje na evropskom i azijskom tržištu.

## **2. Pravni okvir ocjene predmetne koncentracije**

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 34/10).

Konkurencijsko vijeće, u skladu sa članom 43. stav (7) Zakona, pri izračunu ukupnih godišnjih prihoda učesnika koncentracije je koristilo kriterije i standarde Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekta.

## **3. Pravni osnov i oblik predmetne koncentracije**

Pravni osnov koncentracije je Ugovor o zajedničkom ulaganju zaključen dana 5.9.2011. godine između privrednog subjekta Tesla i privrednog subjekta iQ Power, kojim navedeni privredni subjekti namjeravaju osnovati novo društvo koje će biti pod zajedničkom kontrolom na način da privredni subjekt iQ Power posjeduje (..) %\* vlasničkog udjela, dok će privredni subjekt Tesla posjedovati preostalih (..) %\*.

Pravni oblik koncentracije predstavlja zajedničko ulaganje na dugoročnoj osnovi privrednog subjekta Tesla i privrednog subjekta iQ Power, u skladu sa članom 12. stav (1), tačka c) Zakona.

#### 4. Relevantno tržište predmetne koncentracije

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta čini tržište određenih proizvoda/usluga koji su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Relevantno tržište prema predmetu poslovanja učesnika predmetne koncentracije je tržište proizvodnje i prodaje novih i recikliranih akumulatora, dok je relevantno tržište prema teritoriji na kojoj posluju učesnici koncentracije teritorija Bosne i Hercegovine.

Slijedom gore navedenog, kao relevantno tržište predmetne koncentracije određeno je tržište proizvodnje i prodaje novih i recikliranih akumulatora u Bosni i Hercegovini.

#### 5. Obaveza prijave namjere koncentracije

Obaveza prijave koncentracije postoji ukoliko su ispunjeni uslovi iz člana 14. stav 1) pod a) i b) Zakona, odnosno ako ukupni prihod svih učesnika koncentracije ostvaren prodajom roba i /ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i da ukupni godišnji prihod svakog od najmanje dva privredna subjekta učesnika koncentracije ostvaren prodajom roba i /ili usluga na tržištu Bosne i Hercegovine iznosi najmanje 8.000.000,00 KM, ili ako je njihovo zajedničko tržišno učešće na relevantnom tržištu veće od 40%.

Ukupni ostvareni godišnji prihodi učesnika koncentracije na dan 31.12.2010. godine iznosili su:

*Tabela 1.*

( KM)	Tesla	iQ Power	FIB Tesla d.o.o.**	Klas d.o.o. **	Pekara Klas**
<b>Svijet</b>	(..)*	(..)*	-	(..)*	-
<b>BiH</b>	(..)*	(..)*	-	(..)*	(..)*

Izvor: Podaci iz Prijave; \*\* Povezana društva privrednog subjekta Tesla

Tržišni udjeli učesnika koncentracije na relevantnom tržištu novih akumulatora iznose:

*Tabela 2.*

R.B	Naziv proizvoda /marka	Tržišni udio (%)
1.	Tesla	(20-30)*
2.	iQ Power	(0-10)*
3.	Varta	(20-30)*
4.	Black Horse	(30-40)*
5.	Ostali	(20-30)*
<b>6.</b>	<b>Ukupno</b>	<b>100,00</b>

Izvor: Prijava koncentracije

Tržišni udjeli učesnika koncentracije na relevantnom tržištu recikliranih akumulatora iznose:

Tabela 3.

R.B	Naziv privrednog subjekta	Tržišni udio (%)
1.	Tesla	(80-90)*
2.	Ostali**	(10-20)*
3.	<b>Ukupno</b>	<b>100,00</b>

Izvor: Prijava koncentracije; \*\*Grios Grude, BC Metal Banja Luka, Farmakom MB

Analizom podataka iz tabela 1., 2. i 3. Konkurencijsko vijeće je utvrdilo da privredni subjekti učesnici koncentracije u pogledu ostvarenih ukupnih prihoda u 2010. godini nisu obavezni prijaviti koncentraciju u skladu sa članom 14. stav 1) tačka a) i b). Međutim, kako tržišni udio privrednog subjekta Tesla na tržištu reciklaže akumulatora iznosi (80-90%)\*, Konkurencijsko vijeće je utvrdilo da za Podnosiocima prijave postoji obaveza Prijave koncentracije u skladu sa članom 14. stav 1) tačka b) Zakona, jer je njihov zajednički tržišni udio na relevantnom tržištu veći od 40%.

## 6. Analiza relevantnog tržišta

Iz podataka o tržišnim udjelima učesnika na relevantnom tržištu vidljivo je da na tržištu proizvodnje i prodaje novih akumulatora (tabela 2.) ne postoje izrazito dominantni učesnici, odnosno, da su tržišni udjeli najdominantnijih privrednih subjekata dosta ujednačeni i kreću se u rasponu 20-30%. Tržišni udjeli učesnika koncentracije na ovom tržištu iznose (20-30%)\* za privredni subjekt Tesla i (0-10%)\* za privredni subjekt iQ Power.

Iz podataka o tržišnim udjelima učesnika na relevantnom tržištu vidljivo je da na tržištu proizvodnje i prodaje recikliranih akumulatora (tabela 3.) privredni subjekt Tesla ima izrazito dominantan položaj te da njegov tržišni udio iznosi (80-90%)\*, dok je preostalih (10-20%)\* tržišnog udjela podijeljeno između nekoliko privrednih subjekata. Privredni subjekt iQ power kao drugi učesnik predmetne koncentracije, prema podacima iz Prijave, nije prisutan na ovom tržištu.

## 7. Ocjena predmetne koncentracije

Konkurencijsko vijeće je analizom relevantnih podataka, u smislu člana 17. Zakona, ocijenilo da provođenjem namjeravane koncentracije neće doći do značajnog narušavanja tržišne konkurencije, odnosno stvaranja ili jačanja dominantne pozicije učesnika koncentracije u smislu člana 13. Zakona, iz razloga što:

Učesnici koncentracije na tržištu proizvodnje i prodaje novih akumulatora nemaju dominantan položaj (Tesla 20-30%, iQ Power 0-10%)\*, a predmetna koncentracija neće dovesti ni do značajnog povećanja tržišnog udjela općenito, obzirom na relativno nizak tržišni udio privrednog subjekta iQ Power.

U pogledu tržišta proizvodnje i prodaje recikliranih akumulatora Konkurencijsko vijeće je prilikom donošenja konačne odluke uzelo u obzir činjenicu da bez obzira na izuzetno visok tržišni udio privrednog subjekta Tesla (80-90%)\*, predmetnom koncentracijom neće doći do stvaranja novog, odnosno jačanja postojećeg dominantnog položaja, iz razloga što privredni subjekt iQ Power do sada nije učestvovao na navedenom relevantnom tržištu.

Prilikom ocjene predmetne koncentracije Konkurencijsko vijeće je uzelo u obzir i planove Podnosilaca prijave u pogledu uvođenja novih znanja iz oblasti inženjeringa, marketinga i međunarodne prodaje što bi dugoročno moglo imati pozitivne efekte za razvoj tržišta, kao i krajnje potrošače.

Uzimajući u obzir sve iznesene činjenice i podatke koji su prethodili donošenju Rješenja, Konkurencijsko vijeće je ocijenilo koncentraciju dopuštenom, u smislu člana 18. stav (2) tačka a) Zakona.

#### **8. Administrativna taksa**

Na ovo Rješenje Podnosioci prijave, u skladu sa članom 2 stav (1) tarifni broj 107 tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06 i 18/11) dužni su platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

#### **9. Pouka o pravnom lijeku**

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovoga Rješenja.

**Predsjednik**

**Ibrica Lakišić**